



**POLELO EA LETONA LA LITABA TSA MACHABENG,
MOHLOMPHEHI LEJONE MPOTJOANA,
KA LEKHOTLENG LA SECHABA
HOLIMA NTOA E NTSENG E KUPA LIPAKENG TSA
NAHA EA ISRAELE LE NAHA EA PALESTINA**

MASERU

NOVEMBER, 2023

Mohlomphehi Motsamaisi oa Lipuisano,

Bahlomphehi Litho tse Khabane tsa Ntlo ea Sechaba

Ke ema kapele ho lona letsatsing la kajeno ho etsa polelo holima ntoa e ntseng e kupa lipakeng tsa naha ea Israele le Palestina. Le tla hopola hore ka la bosupa khoeling ea Mphalane selemong se holimo (7 October, 2023), ho ile hoa qhoma ntoa lipakeng tsa naha ea Israele le naha ea Palestina, eo litlaleho li supang ha e qhololitsoe ke sehlopha sa Hamas. Hamas ke sehlopha se hlometseng se loanelang tokoloho ea naha le batho ba Palestina khatellong ea naha ea Israele.

Litlaleho li tsoela pele ho supa hore letsatsing lona leo la bosupa Mphalane, sehlopha sa Hamas se ile sa its'ohlometsa ka hare ho naha ea Israele ka mokhoa oa tsome, 'me litlaleho li supa ha Hamas e bolaile Malsraele a ka bang sekete le makholo a mane (1,400) ba kenyeletsang litho tsa ts'ireletso, le ho koetela Malsraele a ka bang makholo a mabeli (200).

Sesosa sa ntoa pakeng tsa Israele le Palestina

Litho tse khabane li tla hoopla hore pele ho selemo sa sekete le makholo a robong, mashome a mane le metso e robeli (1948), naha ea Israele e ne e so thehoe. Naha ea Israele e ile ea thehoa ka sona selemo seo sa 1948 ka mora

geto ea Lekhotla la Machaba a Kopaneng (United General Assembly, eo e ileng ea etsoa ka livoutu tse neng li arohane haholo. Ka nako eo, Lekhotla la Machaba a Kopaneng le ne le nang le litho tse seng kae feela, ka ha ene ena le litho tse ka bang mashome a mahlano a metso e robeli. Linaha tsa Afrika li ne li ka ba 'ne feela ka hare ho Mokhatlo oo.

Mohlomphehi Motsamaisi oa Lipuisano le Litho tse Khabane, ho thehoa hona hoa naha ea Israele ho tlike e le ts'usumetso ea tse ling tsa Linaha tsa bophirima. Ho ea lokela hore ke supe hore ha Naha ea Israele e thehoa, ka hare ho naha ea Palestina boholo ba baahi e ne e le Ma-Palestina (more than 78%). Ka lebaka leo, ho thehoa hona hoa naha ea Israele ho ile hoa hla hoa qala liqabang, tseko le tsekisano ea meeli le mobu ke MaPalestine le Malsraele. Le ha MaPalestina a ne a le mangata hakalo ka hare ho naha eo ea ha bo bona, ts'eho ea meeli ha ho aroleloa

Israele lefats'e la Palestina, ha e eaka ea abela MaPalestina toka ka ha 56% ea naha eo e ile ea fua Malsraele, ha 43% e ile ea abeloa MaPalestina. Kajeno lena, naha ea Palestina e fetohile seka-koloni lefats'eng la eona.

Ho aroleloa Israele naha ea Palestina ho ile ha qholotsa linaha tse ling tsa maArabo tse haisaneng le Palestina ho jella phate. Ka selemo sa sekete le makholo a robong, mashome a ts'eletseng anang le metso e supileng(1967), moo ho ileng hoa qhoma ntoa lipakeng tsa Israele le linaha tse tharo (3) tsa maArabo – e leng Egepeta, Syria le Jorotane, (the Arab-Israeli War\ - the Six-Day War), e le ha ho tsekoa meeli. Pheletsong ea ntoa eo, linaha tsena tse nne (4) li ile tsa etsa tumellano ea meeli. Tumellanong eo, lihlehleke-hleke tsa Gaza (Gaza Strip) le West Bank li ile tsa tsoela-pele e le karolo ea naha ea Palestina, 'me

Jerusalema e Bochabela (East Jerusalem) eona e le motse-moholo oa naha ea Palestina.

Khabareng, naha ea Iraele e ile ea qalella ho ikhapela likaroloana tsa sehleke-hleke sa Gaza, West Bank le East Jerusalem (**land encroachment and expansion of settlements**). Taba ena ea ho ikhapela mobu le meeli e fehlile moea oa lehloeo le bora lipakeng tsa linaha tsena tse peli. Ka bokhuts'aonyane, ho tloha ha naha ea Iraele e thehoa, ha ho ea ka ha e-ba le khotso lipakeng tsa linaha tseo ho ha natsoe litumellano le liqeto tse entsoeng ke Lekhotla la Machaba a Kopaneng (**several UN Resolutions**).

Mohlomphehi Motsamaisi oa Lipuisano,

Litho tse khabane,

Ntoa ena e qhommeng ka khoeli ea Mphalane ke e mahlo-mafubelu ka ho fetisisa kaha ho se ho shoele batho ba kaholimo ho **likete tse leshome le motso o mong (11,000)**, hara bona ho keneletse basali le bana ba kaholimo ho **likete tse ts'eletseng le makholo a mane (6,400)** le ho sengoa hoa thepa le meaho ho kenyeletsa lipetlele, likolo le likereke. Kaholimo ho tsohle, ho na le bothata bo tebileng ba tlhkahalo ea lijo le meriana (**humanitarian assistance**) tse reretsoeng ho thusa mahlatsipa le batho ka kakaretso naheng eo ea Palestina.

Ntoa ena ea khoeli ea Mphalane e bile ea qholotsa Lekhotla la Machaba a Kopaneng (UN General Assembly) ho ba le tulo e ikhethileng ho lima litaba tsa Israele le Palestina (**10th Resumed Emergency Special Session**) ka la 26 October, 2023. Tulong eo ea lona, Lekhotla le ile la fetisa geto tse 'maloa, ho kenyelletsa tse latelang:

- a) Hore ho emisoe ntoa hang hang molemong oa ho pholosa maphelo a batho ba tlokotsing;
- b) Mahlakore ohle a hlomphe melao melao ea machaba ea litokelo tsa botho, ts'ireletso ea sechaba le thepa, 'moho le meaho ea mantlha joalo ka lipetlele le likolo, ekasitana le ho netefatsa hore lijo le litlhoko tsa mantlha li finyella ho batho bohlo ba Mapalestina ka hare ho Gaza;
- c) Ho lumella lithuso tse reretsoeng sechaba se tlokotsing, ho fihla ho sona ntle ho ts'itiso ea letho;
- d) Ho emisa hang hang ho fallisoa ha Mapalestina naheng ea habo bona ka likhoka ke naha ea Israele.

Qeto ena e ile ea ts'ehetsoa ke boholo ba litho tsa Mokhatlo oa Machaba a Kopaneng, ho kenyelletsa le Lesotho. Linaha tse lekholo le mashome a mabeli (120) li ts'ehelitse

qeto ena ha tse leshome le metso e mene (14) li bile khahlanong le qeto ena. Tse mashome a mane a metso e mehlano (45), li khethile ho se oele ka lehojeng kapa leqeleng (**abstained**).

Ho ea lokela hore ke supe Mohlomphehi hore naha ea Lesotho e na le likamano tse mofuthu le linaha tsena ka bobeli. Leano le naha ea Lesotho litabeng tsa likamano tsa machaba (Foreign Policy), le its'etlehile holima leano la Morena Moshoeshoe oa Pele la **“Khotso ke Khaitseli eaka”**. Ka hona, ntlha-kemo ea ‘Musos oa Lesotho litabeng tsena ke hore ho behoe lihlomo fatse, ntoa e emise hang-hang, likhohlano li lokisoa ka lipuisano. Mona, ‘Musos oa Lesotho o ikamahanya le qeto ena ea la 26 Mphalane ea Lekhotla la Machaba a kopaneng ka hohle-hohle, ‘me le ipiletsa ho linaha tsena tse peli, haholo holo Israele, ho ikobela liqeto tsena ka botlalo, ele hore ho rarolloe qaka ena e lipakeng

tša linaha tsena tse peli ka lipuisano le khotso (Lesotho calls for an immediate ceasefire, facilitation of humanitarian aid and assistance and the resumption of negotiations to find a lasting peace).

‘Muso oa Lesotho o nyatsa ka matla tlhaselo e ileng a etsoa ke sehlopha sa Hamas neheng ea Israele ka la 7 Mphalane 2023. Ka tsela e ts’oanang ‘Muso oa Lesotho o nena le ho nyatsa mokhoa oo naha ea Israele e ileng ea arabela tlhaselo eo ea Hamas ka teng. Ho bolaea basali, bana, maqheku le bohle ba sa hlomelang, ‘moho le basebetsi ba Lekhotla la Machaba a Kopane, le hona ho senya litsi tsa lits’ebeletso tsa bophelo, le likampo ho kenyeletsa le tsona likolo, likereke le tse ling, ekasitana le ho tlosa Mapalestina ka sheshe libakeng tseo ba phelang ho tsona ho ea libakeng tse ling ba sena boikhethelo, ha se ntho e amohelang. Ts’ebeliso ea libetsa tse matla tsa moeeng, leoatleng le fats’e, khahlanong le batho ba sa hlomelang ha

e amohelehe. Ka hona 'Musu oa Lesotho o ipiletsa ho Israele ho se sebelise matla a sa tlohang moeli (disproportionate force) ho arabela tlhaselo ea Hamas, le hona ho se ripitle sechaba ntle le khethollo (collective punishment).

Musu o ipiletsa ho Linaha tsena ka bobeli ho hlompha le ho sireletsa litokelo tsa mantlha tsa baahi ba Linaha ka bobeli. Ka ho totobala le ka matla ohle a teng, 'Musu o etsa khoheletso ea hore mahlokore a mabeli, haholo-holo naha ea Israele, a behe lihlobo fats'e, e khaotse ho ruthutha Naha ea Palestina ka liqhomane le li kanono tsa ntoa. Musu ipiletsa ho Lekhotla la Machaba a Kopaneng ho susumetsa hore mahlokore ka bobeli ntoeng ena a kene lipuisanong ha hang ho fumana tharollo ea moshoelella eleng ea Naha tse peli tse phelang ka boahisane le khotso le tlhompaho haholo-holo tlhompaho ea litokelo tsa mantlha tsa botho le tlhompaho ea meeli.

Ha ke liella litema, ke lakatsa ho supa ke sa qeea-qee hore 'Muso oa Lesotho o hoelehetsa ka matla a maholo hore naha ea Isreale e ikamahanye le Liqeto hammoho le Likhothaletso tsa Lekhotla la Machaba a Kopaneng (**United Nations**), tse kenyeletsang hore naha ea Palestina e fumane boipuso ho tsoa ho naha ea Israele, 'me Palestina le Israele li phelisane ka Khotso, e le linaha tse peli tse ikemetseng, e leng bona feela boemo bo tla tlisa tharollo ea moshoelella mathateng a tsona.

Mohlomphehi Motsamaisi oa Ntlo le lona Litho tse Khabane, polelo eaka e fella mona, 'me ke leboha mamello ea lona.

KHOTSO! PULA! NALA